

孝

經

內

外

傳

孝經外傳卷之二目錄

虞

大舜

夏

大禹

殷

孝已

周

文王

武王

周公

會子

仲子

閔子

高子

樂正子

老萊子

尹伯奇

漢

文帝

明帝

清河孝王

石建

樊儵

姜詩

韓俞

汝郁

江革

杜孝

黃香

王修

毛義

廉范

隗相

薛包

歐寶

虞詡

丁蘭

蔡順

范刻子

王陽

周磐

蕭固芝

顧翊

劉寵

古初

文漸

董永

顏烏

匡昕

方儲

鮑昂

郭泰

茅容

彭脩

趙咨

頗琦

蔡邕

孫期

王琳

申屠蟠

趙恂

皇甫遐

柳元卿

矯皓

祭彤

袁閔

羅威

董黯

魯恭 丕

陳紀

樂恢

張霸

孔融

徐胤

三國

顧悌

孟宗

斯敦

陸績

李餘

干顯思

程堅

盛彥

曹休

司馬芝

王裒

晉

齊王

王祥

王延

吳猛

吳坦之

之隱

荀顗

何曾

汜毓

范喬

王猛

桑虞

皇甫謐

山濤

卞眵

劉超

張謏

庾袞

李密

王接

殷仲堪

孔愉

解叔謙

何琦

孟陋

陶侃

夏孝先

李信

劉殷

符表

閻續

楊香

范宣

趙至

李釗

許孜

庾道愍

陳遺

潘綜

牽寶

南北朝

梁武帝

庾沙彌

何子平

崔懷順

阮孝緒

任昉

顏髦

徐孝克

徐孝肅

郭世通

平原

徐份

宗承

崔子約

臧燾
熹

李純

謝幾卿

張敷

辛紹先

柳遐

陸政

荆可

王虛之

樊深

胡豐

趙嬰

庾域
子輿

陸襄

虞荔

雷紹

朱百年

劉瑜

韓懷明

樂頤之

孫法宗

袁廓之

劉猷詩

王僧祐

沈崇僚

荀匠

甄恬

范隆

江泌

江紇

師覺授

劉瓛

陶季直

庾黔婁

蕭放

杜栖

沈麟士

岑之敬

李士謙

蕭叡明

王彭

楊範

丘傑

滕曇恭

吉玢

劉霽

郭文恭

朱泰

閻元明

劉覽

韋師

吳明徹

司馬暉

延義

裴俠

裴子野

劉苞

張稷

夏侯詵

褚修

長孫慮

王文殊

蔡徵

趙琰

張昇

庾震

陶子鏘

張昭

徐普濟

謝朓

顧歡

張譏

王元規

阮卓

雙泰貞

韓靈珍

靈敏

殷不害

王僧孺

熊袞

剡縣小兒

隋

薛濬

梁彥光

田德懋

韓子誕

支叔才

令狐熙

許智藏

王崇

李德林

楊慶

田翼

翟普林

華秋

王少玄

劉審禮

鈕士雄

孝經外傳卷之二目錄終

孝經外傳卷之二

楚黃李之素定庵編輯

虞

大舜

舜父瞽瞍頑母嚚弟象傲皆欲殺舜舜順適不失子道
耕於歷山耕者讓畔陶於河濱器不苦窳漁於雷澤漁
者分均年五十猶嬰兒慕帝堯聞之事以九男妻以二
女遂讓天下

夏

大禹

禹父鯀治水無功殛死禹傷之勞心胼胝居外十三載
漸九川定九州克蓋前人之愆禪天子位禘嘗郊鯀延
祚四百

殷

孝已

孝已高宗之子事親一夜五起視衾之厚薄枕之高下
也高宗惑後妻言放之而死天下哀之

周

文王

文王之爲世子朝於王季日三鷄初鳴而衣服至於寢門外問內豎之御者曰今日安否何如豎曰安文王乃喜及日中又至亦如之及暮又至亦如之其有不安節則內豎以告文王文王色憂行不能正履王季復膳然後亦復初食上必在視寒煖之節食下問所膳命膳宰曰末有原應曰諾然後退

武王

父文王至孝武王帥而行之不敢有加焉文王有疾武

王不能脫冠帶而養文王一飯亦一飯再飯亦再飯旬
有二日乃間

周公

周公旦武王之弟其事文王也行無常制事無由已身
若不勝衣言若不出口有奉持於文王洞洞屬屬如將
不勝如恐失之郊祀后稷以配天宗祀文王於明堂以
配上帝

曾子

曾參字子與南武城人嘗採薪於野客至其家母以左

手搯右臂臂痛參卽馳至又從孔子在楚而心動辭歸
問母母曰思汝齧指孔子聞之曰參之至誠精感萬里
齊欲聘以爲卿不就曰吾父母老食人之祿則憂人之
事吾不忍遠親而爲人役居嘗三日不舉火十年不置
衣而養父母則每食必有酒肉且問所與

仲子

仲由字季路親沒南遊於楚見孔子曰昔者由也事二
親之時嘗食藜藿之實爲親負米百里之外親喪之後
從車百乘積粟萬鍾累相而坐列鼎而食雖欲食藜藿

爲親負米不可復得也子曰由也可謂生事盡力死事盡思者也

閔子

閔損字子騫早喪母隆冬後母以蘆花衣之以絮衣已二子父覺欲出之損泣告曰母在一子寒母去三子單母亦感悔遂成慈母

高子

高柴字子羔衛人足不履影啟蟄不殺方長不折執親之喪泣血三年未嘗見齒

樂正子

樂正子名春嘗下堂而傷其足數月不出猶有憂色門弟子曰夫子之足瘳矣數月不出猶有憂色何也春曰善如爾之間也吾聞諸曾子曾子聞諸夫子曰天之所生地之所養惟人爲大父母全而生之子全而歸之可謂孝矣不虧其體不辱其身可謂全矣故君子頃步而不敢忘孝也今予忘孝之道是以有憂色也

老萊子

老萊子楚人孝養二親年七十猶作嬰兒戲身着五色

斑斕之衣嘗取水上堂詐仆卧地爲小兒啼弄雛於親側欲親之喜

尹伯奇

伯奇吉甫之子母死吉甫更娶後妻妻譖伯奇因放伯奇於野伯奇編芰荷而衣採梔花而食清朝履霜而自傷無罪見逐乃援琴而鼓之宣王出遊吉甫從王聞之曰此孝子之辭也吉甫乃還伯奇

• 漢

文帝

帝名桓高祖第三子初封代王居代時母薄太后嘗病
三年帝目不交睫衣不解帶湯藥非口所嘗不進仁孝
聞於天下

明帝

帝爲光武第四子陰后所生卽祚長思慕至踰年正月
當謁原陵夢先帝太后如平生歡旣寤悲不能寐明旦
遂率百官詣陵寢伏御床視太后鏡奩中物感動悲涕
令易脂澤粧具左右皆泣莫能仰視其日降甘露於陵
樹令百官採取以薦會

清河孝王

王名慶母貴人宋氏被誣自殺塋於樊濯聚王每竊感恨四節伏臘輒祭於私室寶氏誅後始令乳母於城北遙祀及寶太后崩慶求上塚致哀帝許之詔大臣四時給祭具王垂涕曰生雖不獲供養終得奉祭祀私願足矣欲求作祠堂恐自同恭懷梁后之嫌遂不敢言泣向左右以爲沒齒之恨後病謂舅宋衍曰清河埤薄願乞骸骨於貴人塚旁下棺而已朝廷大恩猶當應有祠堂庶母子並食魂靈有所依庇死復何恨乃上書太后曰

臣國土下濕願乞骸骨從貴人於樊濯聚及今日口目尚能言親目昧干請命在呼吸願蒙哀憐遂薨

石建

萬石君石奮河內人景帝朝爲九卿四子俱官二千石咸以孝謹聞長子建爲郎中令白首而父尚無恙每五日洗沐歸舍竊問侍者取親中裙廁牘自澣灑復與侍者不令萬石君知以爲常

樊儵

儵字長魚母嘗病癰儵晝夜匍伏不離左右以口吮癰

父母卒哀毀不自支帝遣小黄門朝暮送餽粥

姜詩

詩字仕游廣漢人事親供養備至妻龐氏尤勤篤母好飲江水水去舍六七里詩兒爲母取水被溺死恐傷母情詐言遊學妻嘗泝流而汲值風雨歸稍遲母渴詩責而遣之妻乃寄止鄰舍晝夜紡績市珍羞使鄰母以意自遺其姑久而姑恠問之知感慚呼還姑性喜魚鱸又不能獨食夫婦常力作供餽呼鄰母共之舍側忽有湧泉味如江水每旦出雙鯉常得以充二母之膳赤眉賊

經詩里弛兵而過曰驚大孝必觸鬼神時歲荒賊遺米肉詩受而埋之比落蒙其安全永平中察孝廉顯宗詔曰大孝入朝凡諸舉者一聽平之尋除江陽令卒於官治鄉人爲立祀

韓俞

俞字伯俞梁人有過其母笞之泣母曰他日笞汝未嘗泣今泣何也對曰他日得笞嘗痛今母之力不能使痛是以泣

汝郁

汝郁陳郡人也五歲母病不食郁亦不食母憐之強食
郁能察色知病輒復不食族人號曰異童年十五著於
鄉父母終思慕致毀推財於兄弟隱於艸澤

江革

革字次翁臨淄人少孤奉母避亂備經險阻嘗採拾以
爲養數遇賊欲劫去革輒泣告有老母在賊亦不忍犯
之且指以避兵之方遂得俱免於難轉客下邳裸跣行
傭以供養周身之物莫不畢給與母歸鄉里嘗以母老
不欲動搖自在輶中挽車不用牛馬鄉里稱之曰江巨

孝肅宗朝拜諫議大夫元和中制詔齊相曰江革前以
病歸今起居何如夫孝百行之冠衆庶之始也國家每
惟志士未嘗不及革縣以見穀千斛賜巨孝常以八月
長吏存問致羊酒以終厥身如有不幸祠以中牢

杜孝

孝巴郡人幼失怙母嗜魚膾孝役於成都截大竹筒盛
魚二頭塞以艸投中流祝曰願母得此食婦出汲於江
見竹筒橫來觸舩取視曰此必吾夫所寄熟以進姑聞
者嘆異

黃香

香字文疆安陸人家貧無奴僕九歲事親躬執勤苦盡
心供養暑則扇枕席寒則以身溫被母沒思慕憔悴年
十二太守劉護召之署門下孝子甚見愛敬香博學能
文章京師號曰天下無雙江夏黃香由郎中累遷尚書
令

王修

修字叔治管陵人七歲母以社日亡來年此日修念母
哀甚鄰里父老皆爲之罷社

毛義

廬江毛義家貧以孝稱南陽張奉慕其名往候之適府檄至以義守安陽令義捧檄而入喜動顏色奉心賤之後義母死服除徵辟皆不就奉嘆曰賢者固不可測往日之喜乃爲親屈也章帝下詔寵之

廉范

范字叔度京兆杜陵人少孤十五歲辭母入蜀迎父喪載船觸石破沒范抱持棺柩俱沉溺衆力救得起遂以喪歸

隗相

相犍爲人母惡江邊水不潔必得江心水乃就飲食相恒以舟汲之患其流急忽江心湧出一石舟乃可俟人以爲孝感朝廷徵拜爲郎

薛包

汝南薛包字孟嘗父娶後妻而憎包出之包不得已廬於外旦入灑掃父怒又逐之乃廬於里門晨昏不廢積歲餘父母慚而還之後居喪過哀諸弟求析產包不能止乃中分其財包則奴婢引其老者田廬取其荒輿者

器物畱其朽敗者諸弟數破產輒復給之公車徵至拜侍中稱疾不起詔賜加禮如毛義

歐寶

寶安城人居父喪廬於墓鄰人逐虎虎投其廬中寶以衣覆之鄰人問寶寶曰虎豈可藏之乎後虎月送一鹿以助祭

虞詡

詡字升卿陳國武平人早孤孝養祖母縣舉順孫相國欲以爲吏辭曰祖母九十非詡不養乃止逮祖母終喪

關爲朝歌長遷武都太守

丁蘭

蘭河內人少喪考妣不及供養乃刻木像事之如生鄰人張叔妻有借於蘭妻妻告木像木像不悅遂不以借張誅罵木像以杖擊其首蘭歸見木像色變詢知故卽奮擊張叔吏捕蘭木像爲之垂淚郡守屬驗實圖其形於雲臺

蔡順

順字君仲汝南人少孤奉母至謹一日母飲於婚家醉

吐順恐中毒乃嘗其吐母生瘡出膿以口漱之間出求
薪有客卒至母望順不還乃噬指順卽心動馳歸王莽
末人相食順拾桑椹異器盛之赤眉賊問故順曰黑者
味甘奉母赤者味酸自食賊亦憫之母年九十終未塋
火逼其舍順伏棺號哭火遂越他室旣塋廬墓側天旦
下神魚四頭置祭母生平懼雷每有雷震輒圓塚泣曰
兒在此累舉孝廉不就

范剡子

剡子二親俱老病思鹿乳遂順承親意衣以鹿皮入山

雜羣鹿中取乳獵者見而欲射之告以故日率爲常親得延壽

王陽

琅琊王陽爲益州刺史行部至九折阪歎曰奉先人遺體奈何數乘此險以病辭去

周磐

磐字堅伯安城人居貧以奉母儉薄不充爲歎嘗誦詩至汝墳之卒章慨然而嘆乃解帚帶應孝廉之舉頗歷三縣後思母棄官歸養教授生徒以終其身郡守題其

廬曰有道

蕭固 芝

固字秀異東海蘭陵人遭父母喪六年哀毀盡禮雉鵲
遊狎其居麋鹿出入其門子芝亦純孝官尚書郎有雉
數十栖宿其廬嘗上直雉輒送之飛鳴車側

顧翽

翽吳人少失怙母好食雕胡飯嘗率子女躬自採擷導
水鑿川家近太湖湖中忽徧生雕胡無復雜艸邑令旌
表其閭

劉寵

寵字祖榮牟平人少受父業以明經舉孝廉除平陵令
母疾棄官百姓泣留不得進乃微服遁歸

古初

古初臨湘人父喪未葬鄰人火起及初舍棺不可移初
匍匐板上號慟以身扞火火頓滅太守鄒甄異之以爲
首舉

文漸

漸資縣人年十七居母喪負土築墓墓木栖烏日共悲

臨有鄉人勾文鼎娶而違親聞漸孝行深自悔責歸養
盡志一時遠近感而化者甚衆

董永

永青州人少失母奉父避兵安陸父沒無以葬乃從里
人貸錢一萬曰後若無錢還當以此身作奴塋畢過槐
樹下遇一婦願爲永妻俱詣錢主家主令婦織縑三百
疋以償一月而畢婦辭永曰我天之織女因君至孝上
帝令我助君償債耳言訖凌空而去

顏烏

孝經外傳

寶田山莊

顏烏會稽人父亾負土成墳羣鳥啣而助之其喙皆傷
因以傷名縣

匡昕

昕字令先母亾已經日昕號叫不已母頗蘇人以爲誠
感所致

方儲

儲字聖公歙人舉孝廉遭母喪奠土築墳種松柏嘉木
數千本致鸞鶴白兔之瑞

鮑昂

昂字叔雅父病數年俯伏左右衣不緩帶及處喪毀瘠
三年孺慕泣血抱負乃行服闋遂潛墓次不關時務舉
孝廉辟公府連徵不至

郭泰

泰字林宗介休人家貧早孤遭母憂以至孝稱嘔血發
病歷年乃瘳

茅容

容字季偉陳畱人年四十餘耕於野避雨樹下衆皆夷
踞容獨正襟危坐郭泰見而異之遂與其語因畱宿其

家旦日容殺鷄爲饌泰意謂爲已設旣而供其母自以
艸蔬與客同飯泰起拜曰卿賢乎哉因勸令學卒以成
德

彭脩

脩字子揚毘陵人年十五時父爲郡吏得休與脩俱歸
道中爲盜所刼脩拔佩刀向盜曰父辱子死汝不畏死
耶盜驚謂曰孝子也毋逼之

趙咨

咨字文楚東郡南燕人少孤州郡舉孝廉不就盜嘗夜

刼之咨恐母驚乃迎盜謝曰老母八十有病須養居貧朝夕無儲乞少置衣糧妻子物一無所吝盜慚而去

頓琦

琦字孝異蒼梧人居母喪獨身立墳歷年乃就手植松栢成行晨夕哭踊有白鳩栖依廬側見人則去見琦則留

蔡邕

邕字伯喈陳留圉人也母滯病三年邕自非寒暑節變未嘗解襟帶母卒廬塚側動靜以禮有白兔馴繞其室

孫期

期字仲或濟陰武城人處貧不仕牧豕澤中奉母盡色養之道從學者皆執經隴畔黃巾賊起相戒勿犯孫先生宅郡舉方正齎羊酒請期期驅豕入莽不顧

王琳

王琳汝南人年十餘歲父母俱亡賊亂鄉鄰逃竄惟琳與弟獨守塚墓號泣不已赤眉遇其弟將殺之琳自繫請先弟死賊矜而俱放還

申屠蟠

名蟠字子龍陳畱人九歲喪父哀毀踰制塚側有甘
白雉之祥每忌日輒三日不食除服不進酒肉者十餘
年蔡邕稱曰大孝

趙恂

趙恂年五六歲時得甘美之物未敢獨食必先以獻父
父出輒待還而後食過時不還則倚門啼以俟父數年
父沒恂思慕羸悴不異成人晝夜悲號於墓側

皇甫遐

遐汾陰人少喪父事母益勤及母喪躬自負土積以歲

年墳高數丈食粥枕塊櫛風沐雨形容癯瘠家人亦莫之識遠近聞之競以米麪相遺皆不受

宗元卿

元卿字希將早喪二親爲祖母所養祖母病元卿在遠輒心痛大病則大痛小病則小痛以此爲常鄉里號曰宗孝子

媯皓

吳郡媯皓父爲南郡坐事繫獄皓懷一石至公卿門輒出石叩頭血流覆面父遂得免

祭彤

彤字次孫早孤事母以至孝稱遇天下亂野無烟火而獨在塚側賊過見其尚幼皆奇而哀之

袁閎

閎字夏甫汝南人父賀爲彭城相閎往省謁徒行無旅旣至府門連日吏不爲通會阿母出見閎驚入白夫人乃密呼見旣而辭去賀遣車送之閎稱眩疾不肯乘反郡界無知者及父卒郡閎迎喪不受賻賵纔扶柩冒犯寒露體貌枯毀手足流血見者莫不傷之服闋累徵

聘舉召皆不應延熹末黨事將作閔遂散髮絕世欲投
跡深林以母老不宜遠遁乃築土室四周於庭不爲戶
自牖納飲食而已日於室中東向拜母母思閔時往就
視母去便自掩閉兄弟妻子不得見也潛身十八年卒
於土室

羅威

羅威字德仁番禺人八歲喪父母年七十天寒嘗以身
溫席而後授其處及長耕耘爲業勤身苦體以奉母瓜
果嘗以時進令長召署門下吏不就與母遁居增城

董黯

黯字叔達鄞人事母孝比鄰王寄之母嘗以黯之孝責寄之不孝寄怒屢辱黯母母亾黯斬寄首以祭自陳於官和帝詔釋其罪

魯恭 丕

恭字仲康平陵人父爲武陵太守卒時恭年十二弟丕七歲晝夜號踊不絕聲郡中賻贈一無所受乃歸服喪禮過成人鄉里稱之

陳紀

陳紀字元方遭父憂每哀至輒嘔血絕氣雖服已除而積毀消瘠殆將滅性豫州刺史嘉其至行表上令圖像百城以勵風俗

樂恢

恢父爲縣吏得罪於令將殺之恢年十一俯伏獄門晝夜號泣令聞而釋之

張霸

張霸成都人年數歲而知孝讓出入飲食自然合禮鄉人號爲張曾子七歲通春秋復欲進餘經父母曰汝小

未能也霸曰我饒爲之故字曰伯饒焉

孔融

孔融字文舉年十三喪父哀悴過毀杖而後起州里稱之後爲北海相

徐胤

徐胤南州徐穉之子字季登少遭父母喪毀瘠嘔血服闋隱居林藪躬耕稼穡倦則誦經貪困寢乏執志彌固不受惠於人也

三國

顧悌

顧悌字子通雍族人每得父書灑掃整衣設几案舒書其上跪讀之每句應諾畢復再拜有疾耗之間至則臨書垂泣哽咽父終水漿不入口者五日孫權爲作布衣一襲強令釋服悌雖公議自割猶以不見父喪常畫壁作棺柩像設神座於下每對之哭泣服未闋而卒

孟宗

宗字公武江夏人在吳爲令每得時物必先以寄母冬月母疾思筍宗入林抱竹泣而求之忽生筍數莖母食

疾愈

斯敦

敦東陽人赤烏間父爲廷尉失儀當死敦叩闕泣血乞以身代吳主嘉之赦其父罪仍表其閭

陸績

績字公紀吳郡人六歲時於九江見表術術出橘待之績懷三枚因拜辭墮地術曰陸郎作賓客而懷橘乎答曰吾母性之所愛欲歸以遺術奇之

李餘

李餘涪城人蜀漢時年十三父殺人出亡母下獄餘乞代母不許遂自殺事聞詔圖像於庭

干顯思

顯思新塗人六歲失怙踰年知求父像時時拜泣及長守貧能以筋力致養母卒累日不進飲食比塋居廬虎馴其側

程堅

堅字謀甫居貧以磨鏡給養母喪哀號櫪下有馬每聞堅哭輒淚出不食芻

盛彥

彥字翁子廣陵人母王氏因疾失明彥不應辟召躬自侍養母食必自哺之母既疾久數捶撻其婢婢忿恨伺彥暫出取蟬蠩炙給之母以爲美然疑是異物密藏以示彥彥見之抱母痛哭母目忽開從此遂愈

曹休

曹休字文烈十餘歲喪父獨與一客擔喪假塋侍老母渡江至吳休祖嘗爲吳郡太守於太守舍見壁上祖父畫像下榻拜涕泣同座者皆嘉嘆母沒悲痛焦毀踰制

曹丕遣侍中奪喪服使飲酒食肉休受詔而形體益憔悴乞歸葬母丕復遣越騎校尉節其憂哀

司馬芝

芝字子華河內人少爲書生避亂荊州於魯陽山遇賊同行者皆棄老弱走芝獨坐守老母賊至以刃臨芝芝曰母老惟在諸君賊曰此孝子也殺之不義芝以鹿車推載母居南方十餘年躬耕守道

王裒

裒字偉元城陽營陵人父儀以直言忤司馬昭見殺裒

終身不西向而坐示不臣晉也隱居教授三徵七辟皆不就廬墓側攀栢悲號涕淚着樹樹爲之枯母存日畏雷沒後每聞雷鳴輒繞墓曰哀在此誦詩至哀哀父母生我劬勞未嘗不三復流涕門人爲之廢蓼莪

晉

齊王

王名攸居文帝喪哀毀過禮左右以稻米乾飯雜理中允進王泣而不受司馬稽喜諫曰毀不滅性聖人之教况荷天下之大業輔帝室之重任而可盡無極之哀與

顏閔爭孱躬自進食王乃爲之強飯

王祥

祥字休徵琅琊臨沂人早喪母繼母朱氏數譖之由是失愛於父每使掃除牛下祥愈恭謹父母有疾衣不弛帶湯藥必先經口母欲食生魚時天寒冰凍祥解衣剖冰求之冰忽自解躍出雙鯉母又思黃雀炙旋有雀數十飛入其幕復以供母有丹柰結實母命守之每風雨輒抱樹而泣祥嘗在別床眠母闇往斫之值其私起空所得被既還因跪前請死母弟覽年數歲見祥屢被楚

撻輒滄泣抱持及成童每諫其母祥喪父之後居憂盡
禮益有時暮母更疾之審使酖祥覽疑有毒祥亦心知
弟兄爭飲母始奪去因慚感悟視如已子武帝卽位拜
太保進爵爲公壽九十四而卒遺訓子孫曰言行可覆
信之至也推美引過德之至也揚名顯親孝之至也兄
弟怡怡宗族欣欣悌之至也臨財莫過乎讓此五者立
身之本也其子皆奉行之

王延

延字元延西河人事親色養備至嚴寒體無全衣而供

奉極滋味晝則傭賃夜則讀書九歲喪母每至忌日則
悲啼一旬繼母遇之無道冬日命延求生魚不得杖之
流血延扣水而哭忽有一魚長五尺蹕出水上時人歌
曰爲母致冰鮮王氏有祥又有延

吳猛

猛字世雲濮陽人八歲時家貧楊無帷帳夏夜先臥任
蚊噬飽手不敢驅恐其去已而噬親也父母終服喪枯
毀蜀賊縱暴焚燒邑屋發掘丘隴民人屏跡猛守墓側
號慟不去賊亦爲之感愴

吳坦之 隱之

坦之濮陽人母將塋設九飯祭每臨一祭輒號慟幾絕
至七祭嘔血而卒弟隱之哭踊踰禮祭塋盡誠家貧無
人鳴鼓每舉哀恒有雙鶴警叫居與太常韓康伯鄰其
母每聞隱之哭聲輒爲之投筯謂康伯曰汝若秉銓當
舉如此輩人及康伯爲吏部遂舉爲廣州刺史

荀顗

顗字景倩年踰耳順而母年九十蒸蒸色養不離左右
在喪憔悴貌不可識若嬰孺之號哀感傍人

何曾

何曾字穎考陽夏人少襲父職性至孝嘗言於司馬昭曰公方以孝治天下而聽阮籍以重哀飲酒食肉宜擯四夷無令汚染華夏傅玄著論稱曾及顗曰以文王之道事其親者其穎昌何侯與荀侯乎古稱曾閔今日荀何

汜毓

汜毓字稚春濟北人父終廬墓三十餘載晦朔躬掃墳壙循行封樹還家則不出門庭武帝累召不就

范喬

弱年方二歲祖馨臨終曰恨不見汝成人以所用硯與之五歲祖母以告喬喬執硯便滄泣後爲名儒

王猛

猛字景畧五歲而父遇害隱居華山終文帝之世不聽音樂蔬食布衣以喪禮自處

桑虞

桑虞字子深黎陽人年十四喪父毀瘠過禮日食米百粒以糝藜藿其姊諭之曰汝毀瘠如此必至滅性滅性

不孝宜自割抑虞曰藜藿雜米足以勝哀丁母憂亦如之

皇甫謐

謐字士安年二十不好學嘗得瓜果輒進所後叔母任氏任氏曰孝經云三牲之養猶爲不孝汝今年餘二十目不存教心不入道無以慰我昔孟母三徙以成仁曾父烹豕以存教豈我居不卜鄰教有所闕何爾魯鈍之甚也修身篤學汝自得之於我何有因對之流涕謐乃感激勤學不怠居貧躬自稼穡帶經而農遂博綜典籍

百家之言始有高尚之志以著述爲務著論爲堊送之制名曰篤終平生之物皆無自隨惟齋孝經一卷示不
忘孝道

山濤

濤字巨源河內人早孤居貧武帝時遷尚書郎以母老辭職詔曰君雖乃心在於色養然職有上下旦夕不廢醫藥且當割情以隆在公濤心求退表疏數十上久乃見聽帝特賜床帳裯褥禮秩崇重後居喪年踰耳順手植松栢負土成墳朝野稱述云

卞眡 眡

卞壺字望之曹州人與庾亮同心輔政蘇峻反壺扶疾力戰死二子眡眡見父沒相隨赴賊同時見害母裴氏撫二子屍曰父爲忠臣汝爲孝子夫何恨乎徵士翟湯聞之嘆曰父死於君子死於父忠孝萃於一門

劉超

劉超字世輔臨沂人遭母憂去官衰服不離身朝夕號泣朔望輒步至墓所哀感路人蘇峻謀逆超爲右衛將軍親侍成帝雖幽厄之中猶啟授孝經論語密謀奉帝

出事泄峻使任讓將兵入收超害之峻平上追贈謚

張謖

張謖字公喬吳人所生母劉無寵遭疾時謖年十一侍
養衣不解帶每劇則累夜不寐及終毀瘠過人杖而後
起見年輩幼童輒哽咽州里謂之純孝兄瑋善彈箏謖
以母劉先執此技聞瑋爲清調便悲感頓絕遂終身不
聽父及嫡母相繼殂太等廬墓所生母先假塋琅琊黃
山建武中改申塋禮賻助委積於時雖不拒絕事畢隨
以還之自幼及長數十年中嘗設母劉氏神座出告反

面如事生焉

庾袞

袞字叔褒鄱陵人諸父盛貴盛惟袞父獨守貧約乃躬親稼穡以給供養父臥作管賣以養母母見其勤曰我無所食對曰母食不甘袞將何居母感而安之母服終喪居於墓側祖墓樹爲人所斬莫知爲誰乃泣謝祖禰曰德之不修不能庇先人之樹袞之罪也父老咸爲之垂泣自後人莫之犯矣在時嘗戒袞以酒後偶醉輒自責曰汝廢先人之戒其何以訓人乃於墓前自杖三十

李密

密字令伯犍爲武陽人年四歲父亡母更適人感戀彌
主遂以成疾祖母劉鞠之成立祖母有疾則涕泣側息
飲膳湯藥必先嘗後進武帝徵詔屢下密辭表曰臣無
祖母無以至今日祖母無臣無以終餘年臣今年四十
有四祖母劉今年九十有六是臣盡節於陛下之日長
報劉之日短也帝曰士之有名不虛然哉賜婢二人并
郡縣供給劉終喪闋仍徵爲太子洗馬

王接

接字祖游河東人幼喪父哀毀過禮鄉黨皆嘆曰王氏
有子哉同郡馬收薦於郡守劉原曰竊見處士王接岐
疑雋異十三而孤居喪盡禮學過目而知義觸類而長
不患立黎之不啟竊樂春英之及時郡守卽禮命接辭
曰接薄祐少孤而無兄弟母老疾篤故無心爲吏耳

殷仲堪

仲堪陳郡人父病積年仲堪衣不解帶躬學醫術究其
精妙執藥拭淚遂眇一目

孔愉

愉字敬康山陰人十三歲而孤虔奉母及祖母以孝聞
建興初討華軼功封愉不容侯蘇峻反愉朝服守宗廟
溫嶠執愉手流涕曰天下喪亂忠孝道廢能持古人之
節義歲寒不凋者惟君一人耳

解叔謙

叔謙鴈門人母疾夜禱於庭聞空中語云此病得丁公
藤爲酒便差謙徧訪至宜都郡山遇老翁伐木問之曰
此丁公藤也謙求歸漬酒母飲之病果瘥

何琦

琦字萬倫陽穀人年十三喪父毀瘠過甚事母孜孜朝夕色養嘗患鮮甘不贍出爲郡主簿母以哀慟幾絕服闋嘆曰所以出身仕者非謂有尺寸之能以效智力實利微祿私展供養耳一旦煢然無復怙恃豈可復以朽鈍之質塵黷清朝哉遂隱衡門累召不起桓溫過其境曰此中有人

孟陋

孟陋武昌人孟嘉之弟布衣蔬食文籍自娛惟思立身行道以顯父母居喪毀瘠殆於滅性不飲酒食肉者十

餘年親族謂之曰聖人制禮令賢者儆就不肖企及若
使毀性無嗣更爲不孝也陋感其言然後從吉桓溫躬
往造焉或勸用之溫歎曰會稽王尚不能屈非敢擬議
也陋聞之曰億兆之人無官者十居其九豈皆高士哉
我疾病不堪從相王之命非敢爲高也

陶侃

陶侃字士行鄱陽人早孤貧母湛氏紡績資給使交結
勝已者范逵造其宅母自剗薦給馬截髮以易酒穀逵
過廬江太守張夔稱美之夔察爲孝廉以軍功封東鄉

侯爲江夏太守加鷹揚將軍乃備威儀迎母官舍後以
母喪去職嘗有二客來弔不哭而退化鶴冲天去欲壅
未得地忽失牛侃往尋之遇一老叟謂曰汝至孝感天
上帝命我指汝吉地前見牛眠處是也鎮武昌時每賓
客讌集酒有定限或勸更少進侃悽然曰年少多酒失
慈親見約故不敢踰

夏孝先

孝先桐廬人父亾莫土築塋廬其側時有野火燎山將
偪塋域孝先繞墓號慟鳥獸群集以毛羽濡水滅之

李信

李信襄平人父敏河內太守棄官歸公孫度欲起之遂
乘舟浮海信求數年不得悲泣絕粒死其子孤幼力學
後官尚書僕射

劉殷

殷字長盛新興人七歲喪父服喪三年未嘗見齒曾祖
母王氏盛冬思葷菜而不言食不飽者一旬矣殷方九
歲問得故乃往澤中慟哭累日若有人云止聲殷收淚
視地便有葷生得斛餘而歸又嘗夢神謂之曰西籬下

有粟掘之果得粟十五鍾銘曰七年粟賜孝子劉殷自是食之七年乃盡累辟皆以祖母老不赴同郡張宣子以女妻之戒曰劉殷至孝冥感終當遠達汝謹事之張氏亦婉順事王母以孝著有子七人各授一經一門之內七業俱興

符表

表年十六時母姜氏有疾侍省晝夜數十日母一食表亦一食母不食表亦不食見母將絕號慟成咽俄頃母沒表亦沒一日二喪在殯塋於四望岡太守樹雙旌闕

以表其墓

閻續

續字續伯巴西安漢人父卒繼母不慈恭事彌謹而母疾之愈甚乃誣其盜父金訟於有司遂被清議十餘年亦無怨色母後意解更移中正乃得復品愍懷太子之廢也續與相詣闕上書理太子之寃曰臣伏念前太子適生於聖父而至此者由於長養深宮父母驕之每見選師率取擊鐘鼎食之家希有寒門儒素之士遂使不見事父事君之道所以敗也官至漢中太守

楊香

楊香十四歲時隨父往田穫粟父爲虎所曳香惟知有父而不知有虎徒手踴躍向前搯持虎頸虎竟靡然而逝

范宣

范宣字宜子陳留人十歲能誦詩書嘗於後園挑菜誤傷手指擇手改容人問痛耶宣曰不足爲痛但受全之體而致毀傷不可居耳家至貧儉躬耕供養親沒哀毀廬墓

趙至

至字景真年十三時新令之官與母道旁視之母曰汝
先世本非微賤世亂流離遂爲士伍耳汝後能如此否
至感母言詣師受業聞父叱耕牛聲投書而泣師問之
曰未能榮養使老父不免勤苦是以泣占戶遼西舉郡
計吏到洛陽與父相遇時母已沒父欲其宦立托故弗
之告仍戒以勿歸至乃還遼西太康中以良吏到洛方
知母沒初至自耻士伍欲以宦學立名期於榮養旣而
志不就號憤嘔血而卒

李釗

李釗父毅寧州刺史討寇死之上嘉其節謚曰威侯釗聞父難棄官至滇一慟而絕

許孜

孜字季義東陽吳寧人二親沒哀毀踰禮負土築塋不藉鄉人之助每一悲號群鳥翔集列植松栢亘五六里一日鹿犯松栢孜嘆曰鹿獨不念我乎明日鹿爲虎所殺孜悵惋不已乃埋於隧側虎卽孜前自撲死亦埋之自後樹木茂暢竟無犯者郡察孝廉不起巾褐終身已

人稱其居爲孝順居

庾道愍

道愍鄱陵人少孤貧母漂流交州道愍尚在襁褓及長知之求爲廣州綏寧府佐至府而去交州尚遠乃自負擔冒險僅得自達尋求母經年不獲日夜悲泣偶入村值驟雨寄止一家有老嫗負薪外來道愍心動詢之卽其母也俯伏號慟遠近聚觀莫不揮淚

陳遺

吳郡陳遺素以母好食鑑底隻飯遺作郡主簿恒裝一

囊毋煮食輒貯雥飯歸以養母後值孫恩亂聚得數斗
未展歸家遂帶以從軍戰於滬瀆敗軍人潰散逃走山
澤多餓死遺獨以雥飯得活母晝夜泣涕目爲失明遺
還入戶再拜號咽母目豁然

潘綜

潘綜烏程人孫恩之亂與父走避父困乏坐地綜迎賊
叩首曰父年老乞賜生命賊斫父綜抱父於腹下賊斫
綜頭面凡四創當時悶絕有一賊曰此子以死救父何
可殺之殺孝子不祥父子俱得免有司奏改其里曰純

孝

華寶

寶無錫人父戍長安時寶八歲父臨別曰須我還當爲
汝冠婚後長安陷寶年至七十不婚冠或問之輒號慟
彌日竟不忍答今慧山華陂寶所築也

南北朝

梁武帝

武帝六歲時獻皇太后崩哭泣有過成人及丁文帝憂
時爲齊王諮議隨府在荊鎮以病聞便投劾星馳不復

寢食倍道就路憤風驚浪不暫停止帝形容本壯及至都銷毀骨立每哭輒嘔血數升服內惟日食麥二溢拜掃山陵涕泗所灑松艸變色

庾沙彌

沙彌鄱陵人父坐事誅時沙彌始生及五歲母製彩衣衣之不衣詰之流涕曰家門禍酷何用此爲嫡母劉寢疾晨昏侍側衣不弛帶或應針灸則以身先試母以終喪不食醢醢夏不解纓冬不衣纊所坐苦淚沾爲爛應純孝之選補歛令復丁所生母喪還都濟浙江大風舟

將覆抱柩號哭俄而風止

何子平

子平廬江潯人爲揚州辟從事史月俸得白米輒貨市粟交人或問之答曰尊老在東不辦得米何容獨食白粲母喪去官年將六十時東土饑荒繼以師旅八年不得營塋晝夜哀號嘗如袒括之日冬不衣絮暑不就清涼日以米數合爲粥不進鹽菜所居屋敗不蔽風日兄子伯興欲爲葺理子平曰我情事未申天地一罪人也屋何宜覆會稽太守蔡興宗力爲營壙

崔懷順

懷順河東武城人父邢利魯郡太守元嘉中沒於陣懷順聞之絕而復蘇時淮北陷沒懷順因北至桑乾載喪還青州徒跣冰雪土氣寒酷而手足不傷

阮孝緒

孝緒字士宗尉氏人十餘歲隨父爲湘州行事不書官紙以成親之清白父喪不服綿纊蔬菜有味輒吐之後於鍾山聽講母王氏忽有疾兄弟欲召之母曰孝緒至性冥通必當自至果心驚而還醫言合藥需人復舊傳

山所產孝緒遍歷幽險累日不得忽見一鹿
之獲焉母服遂愈

任昉

昉字彥升樂安博昌人爲司徒竟陵王記室叅軍以父
憂棄職齊武帝謂伯遐曰聞昉哀瘠過禮使人憂之宜
深相譬抑遐使進飲食當時勉勵臣郎嘔出父性重楨
榔以爲常餌臨終求之剖百許口不得好者昉亦所嗜
好深以爲恨遂終身不食楨榔續遭母喪廬於墓側哭
泣之地艸爲不生

顏髦

髦字君道父喪在殯鄰家失火髦抱棺叫號燹焰逼至忽雨頓絕後歷官太尉至黃門侍郎

徐孝克

孝克東海剡人也侯景亂歲饑乃崎嶇乞食以充母給太宗詔爲國子祭酒每侍宴常取珍果納紳帶中歸以遺母上敕自今宴享孝克前饌並遣將還餉母母病欲粳米爲粥不能常辦母亡後孝克遂噉麥有遺粳米者封之悲泣終身不復食焉

郭世通 原平

世通會稽人年十四居父喪殆不勝哀家貧傭力以養
母母亡負土合塋親戚或共賻助微有所受塋畢傭賃
還先直宋文帝嘉之勅榜獨楓里爲孝行里子原平亦
崇至性養親必以已力傭賃以給主人設食原平自以
家貧父母不辦有脩味唯飡蔬飯而已若家無食則虛
中竟日義不獨飽須日暮作畢受直歸家於里糴米然
後舉爨父篤疾原平衣不解帶未嘗睡臥父亡慟絕數
日方蘇高陽許瑤之罷建安郡丞以綿遺之不受瑤之

往謂曰今歲過寒而建安綿好以此奉若母耳原平乃拜而受母終毀瘠彌甚塋墳凶功不欲假人自不解作墓乃訪邑中有塋墓者爲其運力乃悉窺窆之事墓前有田數畝每至農月見耕者裸袒褻其墓原平輒往哭之久乃買家資買其田躬自耕墾而後安

徐孝肅

孝肅汲郡人早孤不識父及長問其母父狀因圖其形構廟置之而定省焉母老疾親易燥濕憂悴數年母終惟茹蔬飲水而已盛冬單纓毀瘠骨立祖父母父母皆

負土成墳披髮跣足遂以廬墓終身

徐份

份孝穆之子孝穆疾劇醫禱百方不能愈份焚香涕泣
跪誦孝經三日夜不息疾忽豁然

宗承

宗承洛陽人塋父不役僮僕忽一夕間土壤自高五尺
松竹踈密成行

崔子約

子約五歲喪父卽不食肉及居母喪枯毀骨立人云崔

九作孝風吹卽倒

臧燾 燾

臧燾爲助教頃之去官以父母老家貧與弟燾俱棄人事躬耕自業約已養親者十餘年父母亾居喪六年以毀瘠著稱

李純

李純父母寢疾輒終日不食十旬不解衣及丁憂哀慟嘔血數升塋時會仲冬積雪行四十餘里單纓徒跣號踊幾絕會塋者莫不爲之流涕人因改其所居村爲孝

敬村

謝幾卿

幾卿靈運孫父超宗徙越鶴詔家人不得相隨幾卿時
八歲別父於新亭不勝其慟遂投於江超宗命人救之
良久湧出漚耳目口鼻出水數斗十餘日乃能言

張敷

張敷字景胤生而母亡年數歲問知之雖童蒙便有感
慕之色至十歲求母遺物而散施已盡惟得一扇乃緘
錄之每至感思輒開筭流涕見從母悲感哽咽父在吳

與亾成服九十餘日始進水漿塋畢不進鹽菜遂毀瘠
成疾未期而卒孝武卽位追贈侍中改其所居爲孝張
里

辛紹先

紹先仕魏爲下邳太守丁父憂三年口不甘味頭不櫛
沐髮遂落盡

柳遐

遐字子昇聞喜人初爲州主簿父卒於揚州遐自襄陽
奔赴六日而至哀感行路毀瘠不可識後奉喪西歸中

流風起舟人相顧失色遐抱棺號慟天俄頃浪息其
母嘗乳間發疽醫云此疾無可救惟得人吮膿或望微
止其痛遐吮旬日而瘳

陸政

陸政母吳人好食魚北土魚少政嘗求之苦難後宅側
忽有泉出而生魚遂得以供膳人因名其泉爲孝魚泉
荆可

荆可苦身勤力供養其親親喪悲號擗踊絕而復甦者
數四塋後廬於墓次蓬髮不櫛菜食飲水而已舊時塋

域極大榛蕪至深去家十餘里可獨宿其中與禽獸雜處遠近哀感之

王虛之

虛之字文靜石陽人十三喪母三十三喪父二十五年鹽醋不入口久病着床忽一夕夢有人問疾慰曰君自旋愈數日果瘳所居每夜有光如燭庭中楊梅樹隆冬三實墓上橘樹一冬再實

樊深

樊深字文深河東人事繼母甚謹魏永安中隨軍征討

以功累遷中散大夫嘗讀書見吾丘子遂歸侍養孝武
西遷樊王二姓舉義爲所誅深父叔並被害深因避難
攀崖傷足絕食再宿於後遇得一簞餅欲食之然念繼
母老病或免擄掠乃弗食夜中匍匐尋覓母得見因以
饋母還復遁去改易姓名遊學於汾晉間周文平河東
深歸塋其父負土成墳撰孝經喪服問疑各一卷

胡叟

胡叟少孤每言及父母則淚下若孺子號春秋當祭之
前則先求旨酒美膳將其所知廣寧常明陽馮翔田文

宗上谷侯法備提壺執俎至郭外空靜處設座奠拜盡
孝思之敬時燉煌汜潛家善釀酒每節送一壺與叟著
作佐郎博陵許赤武河東裴定宗謂潛曰再三之惠以
爲過厚子惠於叟何其恒也潛曰我恒給祭者以其恒
於孝思也

趙叟

張天水人少失父事母至孝年十四有人盜伐其父墓
前樹者叟對之號慟因執於官見魏右僕射周惠達長
揖不拜自述孤苦涕淚交集惠達爲嘆息者久之

庾域 子輿

域字司大新野人爲懷寧太守罷任還家妻子猶事井
臼而域所衣大布餘俸皆充供養母好鶴唳在位營求
孜孜不息一旦雙鶴來下論者以爲孝感所致子子輿
五歲讀孝經手不釋卷或曰此書文句不多何用自苦
答曰孝德之本何謂不多父在梁州遇疾子輿奔侍醫
藥言淚恒并尋丁母憂哀至泣血父戒以減性乃禁其
哭父出守巴西子輿以蜀道險難啟求侍從獲許後遷
寧蜀子輿亦相隨父於路感心疾每至必叫子輿亦悶

絕及父卒哀慟將絕者再奉喪還鄉秋水猶壯巴東有
灩澦石高出二十許丈及秋至則纔如見焉次有瞿塘
大灘行旅忌之部伍至此石猶不見子輿撫心長叫其
夜五更水忽退減安流南下及渡水復舊行人爲之語
曰灩澦如幙本不通瞿塘水退爲庾公初發蜀時有雙
鳩巢舟中及至隨棲於廬側每聞哭泣之聲必飛翔檐
宇悲鳴激切因立精舍居墓所以終喪手足枯皸待人
而起仍布衣蔬食志守墳墓雖以嫡長襲齊國秩盡推

諸弟

陸襄

襄字師卿吳縣人爲揚州從事以父終此官固辭武帝
不許聽與府司馬換廨居之母患心痛醫方須三升粟
漿時冬月日又逼暮求索無所忽有老人詣門貨漿量
如方劑始欲求直以何失之時以襄誠感所致母憂去
職襄已五十毀頓過禮

虞荔

虞荔餘姚人母隨荔入臺卒於臺內尋而城陷情理不
中由是終身蔬食布衣不聽音樂帝以蔬食積久非羸

齊所堪乃勅曰卿言事已多氣力稍減方欲仗委良須
充壯今給卿魚肉不得固從所執蒞終不從

雷紹

紹九歲而孤及長給事鎮府嘗使洛陽見京都禮義之
美還謂同僚曰徒知邊備尚武以圖富貴不謂文學身
之寶也生世不學其猶穴處何所見焉遂逃歸辭母求
師經年遍孝經論語嘗讀至人行莫大於孝乃投卷歎
曰吾違離侍養非人子之道卽還鄉里躬耕奉養遭母
憂哀毀骨立由是知名

朱百年

百年少有至性親沒服闋携妻孔氏入會稽南山隱迹
避人惟與同縣孔顗友善家貧甚母以冬月亾衣並無
絮自此不衣綿帛嘗寒時就顗宿衣悉袂布醉後顗以
臥具覆之百年不覺也旣覺引臥衣去體謂顗曰綿定
奇温因流涕悲痛顗亦爲之傷感

劉瑜

劉瑜七歲喪父事母至孝年五十二喪母三年不進鹽
醋號泣晝夜不絕聲勤身力以營塋事服除二十餘年

經襟蔬食言輒流涕居墓側未嘗暫違

韓懷明

懷明上黨人客居荊州十歲母患尸疰每發輒危殆懷
明夜於星下稽顙祈禱時寒甚忽聞香氣空中語曰童
子汝母須臾自差無自勞苦未曉而母果平復

樂頤之

頤之字文德涅陽人仕劉宋爲京府叅軍父在郢以頤
之忽悲戀涕泣因請假還中路果得父凶問卽徒步奔
馳扶歸備塋嘗自病痛齒被至碎而不言恐母憂也吏

邨邨庾杲之造訪欵以枯魚菜菹而已杲之不能食母
因出其膳杲之曰卿過於茅季偉我愧非郭林宗

孫法宗

法宗一名宗之吳興人父隨孫恩入海溼被害尸骸不
收兄母並餓死子身困苦宿艸履霜辦棺營塚塋送母
兄復入海尋求父尸見枯骨則刻肉灌血臂脛無完膚
血脈枯竭終不得逢遂衣衰經以終其身

袁廓之

廓之字思度陽夏人因父死非命終身不聽音樂布衣

疏食足不出戶誓不臣宋時人比之晉王裒云顧延之
母見嘆曰有子如袁廓之足矣仕齊至太子洗馬

劉歆 訐

劉歆與族弟訐並隱居求志奉母寢食不離左右母意
有所需口未及言歆已先知手自營辦以供晨夕母每
疾病夢歆進藥翼日轉有間效謚曰貞節處士訐數歲
父母繼卒居喪哭血孺慕幾至滅性赴弔者莫不稱焉
自傷早孤人有誤觸其諱者未嘗不感激流涕謚曰玄
貞處士

王僧祐

僧祐字胤宗未弱冠頗經憂居喪服闋髮落殆盡不立
冠帽舉秀才爲驃騎法曹羸瘠不堪受命

沈崇僚

崇僚字思整武康人六歲丁父憂哭踊過禮及長傭書
養母太守柳惲辟爲主簿從惲到郡還迎其母未至而
母卒崇僚以不及侍疾將欲致死水漿不入口晝夜號
哭旬日殆將氣絕兄弟謂曰殯塋未申遽自毀滅非全
孝道也崇僚乃稍進食母權瘞去家數里哀至輒之瘞

所不避風雪每倚墳哀慟飛鳥翔集夜有猛獸來望之
有聲狀如嘆息者家貧無以遷厝乃傭工數年始獲塋
焉既而廬於墓次自以初行喪禮不備復以塋後更行
服三年外食麥屑不噉鹽醋坐臥以單薦因虛腫不能
起郡縣舉至孝除永寧令自以祿不及養哀思不自堪
未至縣卒

荀匠

匠字文師潁陰人父仕齊安復令卒匠號慟氣絕身體
皆冷至夜乃蘇既而犇喪每宿江渚商旅不忍聞其哭

聲其兄斐爲鬱林太守死於陣匠迎於豫章望舟投水
急救得存自是居父憂並兄服歷四年不出廬戶自括
髮不復髭沐皆禿落哭無時聲盡則繼之以泣目眇皆
爛形骸枯頽雖家人不復識梁武帝遣詔爲其除服擢
爲豫章王國左常侍匠意不拜外祖孫謙戒之曰主上
以孝臨天下汝行過古人故擢汝此職非惟君父之命
難拒固亦揚名後世所顯豈獨汝身哉匠乃拜

甄恬

甄恬數歲喪父哀感有過成人家人矜其小以肉汁和

飯飼之終不食年八歲嘗問其母恨生不識父遂悲泣
累日忽若有見言形貌則其父也家雖貧養母常覓珍
羞及居喪廬墓恒有鳥元黃雜色集於墓樹恬哭則鳴
哭止則止

范隆

隆字玄嵩鴈門人父方魏鴈門太守隆在孕十五月而
生四歲又喪母哀號之聲感動行路單孤無總功之親
族人范廣憫而養之隆好學修謹奉廣如父晝耕夕讀
州郡薦舉皆不應

江泌

泌字士清考城人少貧以斫屨爲業母早亡泌以生缺
供養爲歎遇鮭不忍食菜不食心以其有生意惟食老
菜而已墓所忽爲野火所燒泌哭三日淚盡繼之以血
世稱爲孝泌

江紉

紉字含潔考城人年十三父患眼紉侍疾晷月衣不解
帶夢一僧云患眼飲慧眼水必瘥乃訪之艸堂壽智師
曰慧眼見真能度彼旡紉乃捨里舍爲寺及就因泄故

并其水清冽取以爲父洗眼煮藥果瘥

師覺授

覺授北魏涅陽人於路忽見一人持書一函題曰至孝師君苦前俄而不見捨車奔歸適值親死一叫而絕良久乃甦後撰孝子傳八卷累辟不就

劉瓛

劉瓛字子珪宋沛郡相人祖母病疽經年手持膏藥漬指爲爛母孔氏謂親戚曰阿稱便是今世曾子稱瓛小字也及居母憂住墓下不出廬足爲之屈杖不能起此

山常有鵲鴝鳥嘯在山三年不敢來服釋還家乃至

陶季直

季直五歲喪母哀若成人初母未病令於外染衣卒後家人始贖季直抱之號慟聞者莫不酸鼻

庾黔婁

黔婁字子期仕南齊爲孱陵令到縣未旬父易在家遘疾婁忽心驚舉身流汗卽日棄官歸時父疾始二日醫云欲知瘥劇但嘗糞甜苦黔婁嘗之味轉甜心甚憂每夕同妻稽顙北辰求以身代俄聞空中語曰徵君命盡

不可復延念汝虔禱至月末可耳果晦日亡

蕭放

放字希逸梁宗室子也隨父祇至鄴邸卒居喪以孝聞所居廬室前有二慈烏來集各攬一樹爲巢自午以前馴庭飲啄午後更不下樹每臨祭時舒翅悲鳴全似哀泣家人伺之未嘗有缺時以爲純孝之感

杜栖

杜栖字孟山父亡水漿不入口七日猶哭不絕每朔望節歲嘔血數升至祥禪夜夢其父一慟而亡年三十六

沈麟士

麟士字靈禎武康人居喪盡禮忌日輒傷感彌旬嘗作竹傷手便流涕而還同作者謂曰此不足損何致涕零答曰此本不痛但遺體毀傷因悲耳居貧織簾誦書口手不息鄉里號爲織簾先生

岑之敬

之敬字思禮棘陽人五歲讀孝經每焚香正坐親戚咸加嘆異十六策春秋左氏制旨孝經義擢爲高第御史奏曰皇朝多士例止明經若顏閔之流乃應高第梁武

省其策曰何妨我復有顏閔耶因召入面試令之敬升
講座勅中書舍人朱异執孝經唱士孝章武帝親自論
難之之敬剖釋縱橫左右莫不嘆服

李士謙

士謙平棘人髫髻喪父事母以孝聞母曾嘔吐疑中毒
因嘗之伯父深所嘉尚每稱此兒吾家曾子也年十二
魏廣平王贊辟開府叅軍事丁母憂居喪骨立有姊適
宋氏不勝哀而死士謙服闋捨宅爲伽藍脫身而出詣
學請業研精不倦隋有天下畀志不仕自以少孤未嘗

飲酒食肉口無殺害之言親賓至輒陳樽俎對之危坐
終日不倦

蕭叡明

叡明南蘭陵人仕員外殿中將軍母病積年沉臥叡明
祈禱於天時隆冬下淚爲之水如筋額上叩頭血亦水
不流忽有人以小石函授之曰此療夫人病叡明跪受
之條不見函中惟有絹三寸丹書爲日月字母服之卽
平

王彭

王彭直瀆人父母凶家貧無以營塋晝則傭工夜則號泣鄉里憐之塋所去淮五里荷擔遠汲爲艱忽一旦大霧生泉塋畢水泉自竭詔改其里爲通靈里

楊範

範字文端齊人齊宋之亂母在城中採椹藏於地夜取之進母如是非一日忽於地中得米十斛上有文云賜孝子楊範以資給母

丘傑

丘傑吳興人年十四歲遭母喪以熟菜有味啖生菜歲

餘中蝦蟆毒夢母曰死止是分別耳何事乃爾荼苦靈
牀前有藥三丸可取服之傑驚起果得藥服之卽下痢
斗子數升而愈

滕曇恭

曇恭南昌人五歲時母楊氏患熱思瓜非其時歷訪不
得曇恭且行且悲遇一僧曰我有一瓜相遺持歸奉母
舉室驚異時號滕曾子太守王僧虔引爲功曹不就

吉玢

吉玢字彥霄雋州人父爲原鄉令被吏所誣逮詣廷尉

玢時年十五號泣衢路祈請公卿見者皆爲隕涕其父
理雖清白而耻爲吏訊乃虛自引咎罪當大辟玢乃撻
登聞鼓乞代父命梁主以其幼疑人教之使廷尉訊之
對曰囚雖年幼豈不知死之可畏顧諸弟幼惟囚爲長
不忍見父極刑所以內斷胸臆上千萬乘此非細故奈
何受人教耶上乃宥其父罪丹陽尹王志欲於歲首舉
充純孝玢曰異哉王尹何量玢之薄乎父辱子死斯道
固然若玢有覩面目當此舉是因父取名何辱如之固
拒而止

劉燾

燾字士湮年十四居父憂每哭輒嘔血家貧立志勤學
母胡氏寢疾燾年已五十衣不弛帶者七旬母以廬於
墓門哀慟過禮阮孝緒致書抑譬焉燾思慕不已未終
喪而卒

郭文恭

文恭太原平遙人仕爲太平縣令年踰七十父母俱以
災慕罔極乃居墓次晨夕拜泣跣足負土更培祖父二
墳寒暑竭力積年不已見者莫不滂淚

朱泰

泰湖州武康人家貧鬻薪養母嘗適數十里外易甘旨以進泰服食麤糲戒妻子常候母顏色一日鷄初鳴入山爲虎攫去已瞑眩忽少醒厲聲曰虎爲暴食我所恨我母無托虎忽棄泰於地走不顧如有疾驅狀泰亦匍匐歸母抱之泣泰猶茫然也不踰月如故鄉里感之遺以金帛目爲朱虎殘

閻元明

元明安邑人除北隴郡太守以遺親養與言悲慕母亦

慈念泣淚喪明悲號上訴許歸奉養一見其母母目便
開有司狀聞詔表其里

劉覽

覽字孝智彭城人母憂廬墓三年不嘗鹽酪食麥粥而
已隆冬止衣單布家人慮之中夜竊置炭於床下覽因
煖得寐及覺知之號慟嘔血梁武帝數使省視

常師

常師字公穎杜陵人少就學始讀孝經捨書而嘆曰各
教之極其在斯乎少丁父母憂居喪盡禮州里稱其有

孝行

吳明徹

明徹字通昭秦郡人幼孤年十四感墳塋未修家貧無以取給乃勤耕種天下亢旱苗稼隳枯明徹哀憤每之田中號泣仰天自訴居數日有自田還者云苗已更生明徹疑其給已及往如言秋大穫足充塋用

司馬暠

暠字子昇建昌人年十二丁內艱哀慕過禮水漿不入口殆經一旬每號慟必至悶絕丁父憂毀瘠愈甚廬於

墓側日進麥粥一升墓在新林連接山阜舊多猛獸曷
結廬數載豺狼絕跡常有兩鳩栖宿廬所馴狎異常子
延義初隨父入關丁母憂喪過於禮及曷還都乃躬負
窆櫬晝伏宵行冒履冰雪手足皸瘃至都遂至孿廢數
年乃愈

裴俠

裴俠字嵩和解人年十三遭父憂哀毀若成人將擇塋
地忽聞空中有人曰童子何悲塋於桑林東封公侯俠
以告母母曰神也吾聞鬼神福善爾家未嘗有惡以吉

祥告汝耳時俠宅有大桑林因塋焉後進爵爲侯

裴子野

子野字幾原生而母魏氏亡爲祖母陰氏所養年九歲陰氏亡泣血哀慟家人異之父寢疾彌年子野禱請備至涕泗霑濡父夜夢見其容旦召視如夢俄而疾間以爲至孝所感及居喪每之墓所艸爲之枯

劉苞

劉苞字孝嘗三歲而孤至六七歲見諸父嘗泣其母謂其畏憚怒之苞曰早孤不及見父聞諸父多相似故心

中悲耳因相抱泣下初苞父母及兩兄相繼亡悉假瘞焉苞年十六始移墓所經營改塋不資諸父奉大母朱夫人及所生陳氏並扇席溫枕諸叔父常嘆服之

張稷

稷字公喬吳人年十一遭母疾衣不解帶夜不安枕及終毀瘠被而後起見年輩幼童輒哽咽泣淚州里謂之純孝後官御史中丞

夏侯訢

訢字長况寧陵人侍母疾衣不解帶者三年母憐其苦

令出便寢息所方假寐夢其父告之曰汝母非凡藥可
愈上帝憐汝賜以仙藥在室後桑枝上訢驚起如所得
藥服之病頓瘥

褚修

褚修錢唐人父仲都歷五經博士少傳父業爲宣惠叅
軍記室父喪毀瘠過禮因患冷氣復丁母憂水漿不入
口二十三日每號慟輒嘔血竟以毀卒

長孫慮

慮代人母因飲酒父叱之誤以杖擊死坐罪慮列辭上

書云父母忿爭本無餘惡直以謬誤一朝橫禍今母未
殞父命且夕慮兄弟五人並冲幼慮身居長今年十五
有一女弟始四歲父若就刑交墜溝壑乞身代父使嬰
弱得蒙存立尚書奏云慮於父爲孝子於弟爲仁兄原
情究狀實可矜憐詔恕其父死罪

王文殊

文殊字令章父沒於魏思慕泣血立小屋縣西端拱其
中歲時伏臘朔望北向長悲蔬食麻縕三十餘年詔榜
其里曰孝行

蔡徵

徵字希祥年六歲詣梁吏部尚書褚翔翔嘆其穎異七歲丁母憂居喪如成人禮繼母視之不以道徵侍奉益謹初無怨色本名覽父以其有王祥之性故爲之更名陳大業中遷太子舍人

趙琰

琰字叔起天水人父溫卒於仇池遭亂母爲乳母携奔壽春年十四始歸歡如再世飲食必親調奉爲兗州司馬積四十餘年甫得塋祭久絕葷酒惟食麥飯而已

張昇

張昇京縣人喪父哀號以夜繼晝形容枯槁髮墮落聲聞鄉里盜賊不侵其境

庾震

震字彥文新野人父母俱亡貧不能葬賃書積歲因獲措辦南陽劉虬爲之撰傳

陶子鏘

子鏘字海育母終居喪盡禮與范雲鄰雲每聞其哭聲必動容改色母嗜蓴恒以供奠梁武義師初至營蓴不

得子鏘痛恨號哭而絕久之乃甦遂長齋寡味

張昭

昭字德明陳吳郡人父患消渴嗜鮮魚昭乃身自結網捕魚以供朝夕及父卒不衣綿帛不食甘美日惟啜麥屑粥每感慟必至嘔血服終又喪母哀毀如之

徐普濟

普濟臨湘人居喪未塋鄰火將及濟號慟伏棺以身蔽火鄰人往救焚炙已悶絕累日乃蘇

謝璿

謝瞻字宣鏡年數歲母郭氏疾瞻晨昏溫清勤容戚顏
未嘗暫改恐僕役營疾懈倦躬自執勞母久疾畏驚一
家尊卑感瞻至性咸納履行屏氣語如此者十餘年

顧歡

歡字景怡鹽官人母喪水漿不入口六七日遂隱不仕
於剡天台山開館授徒嘗近百人有病邪者問歡歡曰
家有何書答曰惟有孝經而已歡曰可取仲尼居置病
人枕邊恭敬之自差也病者果愈後人問其故答曰善
機惡正勝邪此病者所以差也南齊高帝召爲太學博

士不就

張譏

譏武城人幼喪母有錯綵經帕卽母之遺制及有所識
家人具以告之每歲時輒對帕哽噎不能勝及丁父憂
居喪哀癯過常爲士林館學士簡文在東宮出士林館
發孝經題議論義往復甚見嘆賞

王元規

元規字正範事母勤謹晨昏未嘗離側梁時山陰縣忽
暴水流漂居宅元規得一小船倉卒止引其母並姊妹

入船不得帶其男女三人俱閣於柳樹杪及水退咸獲安全

阮卓

阮卓父隨岳陽王出鎮江州卒卓時年十五自都奔赴水漿不入口者累日載柩還都渡蠡湖中流遇疾風船幾沒者數四卓仰天悲號俄而風息

雙泰貞

泰貞吳興人沈攸之起兵召之泰貞殺傷數人不從攸之將母去泰貞自歸求母攸之曰此孝子也釋之

韓靈珍 靈敏

會稽靈珍靈敏兄弟早孤並有至性母尋又亡貧無以營塋兄弟種瓜朝採而暮復生塋事由此舉

殷不害

北魏于謹伐梁入江陵殷不害失其母時冰雪交積死者橫溝不害行哭於道見溝中死人輒投下捧視舉體凍濕水漿不入口號哭不輟聲如是三日乃得之

王僧孺

僧孺東海郟人年五歲讀孝經問授者曰此書何所述

曰論忠孝二事僧孺曰若爾願嘗讀之有餽其父冬李者先以一與之僧孺不受曰大人未見不容先嘗家貧備書以養母寫畢諷誦亦了後歷官御史中丞

熊袞

熊袞爲魏尚書廉介自守父喪未塋晝夜號泣忽天雨錢三日得以襄事

剡縣小兒

小兒年八歲與母俱得赤斑病母死家人不令小兒知小兒疑之問云母嘗數問我病今不復問何也下床匍

匍至母側號慟而絕

隋

薛濬

濬字道願少孤養母以孝聞開皇中歷考功侍郎上賜其母几杖輿服四時珍味母喪命鴻臚監護喪歸塋夏陽時隆冬極寒濬褰絰徒跣冒犯雪霜自京及鄉五百餘里創血墮指州里賻助一無所受尋起令視事上見其毀瘠過甚爲之改容其弟謨時在揚州爲王府兵曹叅軍事乃遺書於謨曰吾以不造幼丁艱酷窮遊約處

屢絕簞瓢晚生早孤不聞詩禮賴奉先人貽厥之訓獲
稟母氏聖善之規負笈裹糧不憚艱遠砥行礪心因而
彌篤自釋未登朝於茲二十三年矣雖官非聞達而祿
喜逮親庶保期頤得終色養何圖精誠無感禍酷沴臻
兄弟俱被奪情苦廬靡申哀訴是以叩心泣血實氣摧
魂者也既而創鉅釁深不勝荼毒啟手啟足幸得全歸
使夫死者有知得見先人於地下矣傳念汝伶俜孤宦
遠在邊服顧此恨恨如何可甯冀汝面訣忍死待汝汝
既不來便成今古緬然永別書成而卒

梁彥光

彥光烏程人七歲時父遭疾篤藥需紫石英求之不得
彥光憂瘁不知所爲忽見園中一物光怪持歸卽紫石
英也疾尋愈彥光累遷小馭下大夫母憂去職哀毀不
支起令視事帝見其毀甚嗟嘆久之

田德懋

德懋高平人開皇初以父軍功賜爵平原郡公丁父艱
哀慕泣血廬墓三年高祖聞而嘉之

韓子誕

子誕天水人親沒負土築墳口不能食居不能安哀戚成疾及卒視其脊骨皆毀中外聞者莫不感泣

支叔才

叔才定州人隋末荒饉母爲賊執叔才告以情賊憫其孝釋之母病癰叔才吮瘡注藥及亾哭無時聲目皆皆爛有白鵲止其墓側

令狐熙

令狐熙字長熙以母憂去職殆不勝哀其父告之曰大孝在於安親義不絕嗣吾今見存汝又隻立何得過爾

毀頓貽吾憂也熙自是稍加饘粥復丁父憂非杖不起
人有聞其哭聲莫不爲之下泣

許智藏

智藏高陽人幼常以母疾遂覽醫方因而究極誠諸子
曰爲人子者嘗膳視藥不知方術豈謂孝乎由是世相
傳授仕梁爲員外散騎侍郎

王崇

王崇身勤稼穡以養二親仕梁州鎮南府主簿母亡杖
而後起髣髴墜落權殯宅西晝夜哭泣鳩鵲羣至有小

烏素質黑眸形大於雀栖於崇廬母喪闋復丁父憂哀
毀過禮是年夏風雹所經處禽獸暴死艸木摧折至崇
田畔風雹便止禾麥十頃竟無損落

李德林

德林字公輔安平人年十六遭父憂自駕靈輿反塋故
里時嚴寒單纓跣足州里人皆敬慕之居貧輒軻母氏
多疾方畱心典籍無復宦情其母後病稍愈偁令仕進
丁母艱以至孝聞朝廷嘉之裁百日奪情起復固辭不
起

楊慶

楊慶河間人郡察孝廉以侍養不就母有疾不解襟帶者七旬及居憂哀毀骨立隋高祖受禪授平陽太守

田翼

田翼奉母素以勤謹稱母患暴痢翼疑中毒親嘗穢惡母終翼一慟而絕妻亦不勝哀而死鄉人共厚塋之

翟普林

普林楚丘人躬耕色養不應州郡辟命鄉里稱爲楚丘先生父母疾親易燥濕忌寢食者七旬大業初父母俱

亾思慕不絕於心培土成塚家有烏犬常隨在墓側

華秋

華秋汲郡臨河人家貧傭賃養母母終負土築塋形枯骨立有欲助之者輒拜而止之時縣犬獵一兔奔入秋廬中匿其膝下獵人異之自此免常宿廬中馴其左右隋末羣盜紛掠必相戒曰勿犯孝子鄉賴秋全者甚衆

王少玄

少玄聊城人隋末父死於兵遺腹生少玄甫十歲問父所在母以告卽哀泣求尸時野中白骨覆壓或曰以子

血而滲者卽父背也少玄鏡膚滴血越旬而獲遂以塋

劉審禮

審禮彭城人少喪母爲祖母元所養隋末大亂負祖母
渡江轉側避地及平復入長安元每疾必親視藥嘗而
進元曰兒孝通幽顯吾一顧念疾輒間貞觀中歷左驍
衛卽將及父喪會塋徒跣血流行路咨嘆服除襲爵讓
其弟見父執輒感泗滂沱事繼母尤謹而妻子執事苦
晏如也

鈕士雄

士雄安邑人喪父廬於塚側其宅前有一槐樹先甚鬱
茂及士雄居喪遂枯死服除還宅槐復榮高祖詔褒揚
之號其居爲累德里

孝經外傳卷之二終